

李文恭公遺集

李文恭公奏議卷八目錄

湘陰李星沅石梧著

男

概榛

編次

陝撫

揀員請升鄜州知州摺子

附奏京控咨交案件依限辦理片子

特參褒城縣典史摺子

附奏盤查司道庫貯銀錢片子

李文恭公奏議

卷八目錄

揀員請調大荔縣知縣摺子

審擬教匪摺子

附奏請獎拏獲習教匪犯各員片子

審擬謀故殺期親兄嫂二命人犯摺子

涼州副都統文祥呈請開缺摺子

揀員對調知縣摺子

附奏委署西安府知府片子

奏報秋禾約收分數摺子

委護道篆並署府州縣各缺摺子

查報陝省三年以前民欠及借穀各數摺子

審擬越獄脫逃絞犯摺子

奏報交卸撫篆請

訓入京摺子

揀員請升鄜州知州摺子

奏爲揀員請升北山要缺知州仰祈

聖鑒事竊照鄜州知州崇杞林告病出缺業經臣恭疏

具

題在案所遺員缺係繁疲難兼三例應在外揀員升

調該州地處北山界連甘肅訟案歧出緝捕較繁

所轄三縣均資督率考核必須精明強幹之員方

足以期整頓臣與署藩臬兩司在通省直隸州知

州及同知竝府屬知州內逐加遴選非現居衝要
卽人地未宜實無合例堪調之員惟查有大荔縣
知縣潘政舉年四十七歲安徽進士卽用知縣籤
掣陝西

題補延川縣知縣道光二十年三月到任調補今職
二十三年閏七月到任二十四年

大計卓異現署咸甯縣知縣該員年壯才優精細明
決歷俸已滿三年曾署鄜州篆務熟悉情形且係

大計卓異應升之員以之升補鄜州洵屬合例亦堪
勝任據署藩臬兩司會詳前來臣與署督臣往返
札商意見相同合無仰懇

天恩敕部核覆准以大荔縣知縣潘政舉升補鄜州直
隸州知州實於北山要地有益如蒙

俞允該員卓異尙未引

見今請升直隸州應俟部覆至日併案給咨赴部所遺
大荔縣知縣係衝繁難要缺容再揀員調補合併

陳明所有請升要缺知州緣由謹會同署督臣鄧
廷楨合詞恭摺具

奏伏乞

皇上聖鑒訓示謹

奏 道光二十五年六月二十四日具

奏奉

硃批另有旨欽此內閣奉

上諭李星沅奏揀員請升北山要缺知州一摺著照所

請陝西鄜州直隸州知州員缺准其以潘政舉升補
照例併案送部引見該部知道欽此

附奏京控咨交案件依限辦理片子

再前准吏部咨欽奉

上諭各省京控咨交案件嗣後著各該督撫將逾限未結之案每屆半年彙奏請旨交部議處一次俾承辦各員咸知儆畏等因欽此欽遵在案查陝省京控咨交各案自本年正月以來有乾州民王大善洋縣民宋文益二起業經提集人証督飭審擬完結現止大荔縣民李生春一起亦已行司提審核計限

期並無遲逾此外再無續准咨交案件除將現訊
之案督率承辦各員隨時審擬依限辦理外所有
查明京控案件並無逾限緣由理合附片陳明謹
奏

硃批覽欽此

特參褒城縣典史摺子

奏爲特參疎防監犯脫逃之典史請

旨革職提審以肅

功令仰祈

聖鑒事竊據漢中府褒城縣知縣侯國璋詳稱本年五月二十五日該縣因案奉調赴府會審於六月初四日接據典史喬永安申報是月初三日夜監犯黃汶章乘禁卒人等困倦睡熟扭斷鐐銬柵門鐵

鎖脫去紅衣撥開水道磚塊逃逸隨即馳回勘明
選差懸賞勒緝等情臣以監獄重地典守官責有
攸歸節經諄飭各屬隨時慎益加慎近復欽奉

諭旨訓示嚴明復經通飭凜遵不准稍涉疎懈茲查該
犯黃汶章係行竊事主張風等銀物計贓逾貫訊
供通報尙未招解之犯定案罪應絞候該典史專
司監獄並不嚴密防範致被脫逃實屬玩泄且恐
有鬆放刑具受賄故縱情事據署藩臬兩司揭報

前來除飛咨各省協緝暨督飭所屬一體嚴拏逃犯黃汶章務獲竝飭司委員摘取該典史鈐記接署外相應請

旨將管獄官褒城縣典史喬永安革職拏問以便提同刑禁人等嚴訊有無賄縱情弊按律定擬至有獄官褒城縣知縣侯國璋雖先期奉調赴府究屬失防應勒令嚴緝俟限滿能否弋獲竝確查公出有無案據同各上司失察職名再行分別辦理所遺

褒城縣典史員缺陝省現有應補人員飭司另行
咨補合併陳明爲此恭摺具

奏伏乞

皇上聖鑒謹

奏 道光二十五年六月二十四日具

奏

硃批另有旨欽此內閣奉

旨這所參疎防監犯脫逃之陝西褒城縣典史喬永安

著革職拏問交該撫提同刑禁人等嚴訊確情按律
定擬具奏褒城縣知縣侯國璋著勒令嚴緝俟限滿
能否弋獲竝公出有無案據著該撫查明分別辦理
餘依議欽此

附奏盤查司道庫貯銀錢片子

再臣奉

命暫署陝西巡撫適署藩司劉源灝接收升任藩司鄭祖琛交代例應盤查司道庫貯銀錢隨行據署藩司及督糧道各將庫貯銀兩錢文造冊前來臣親詣查明藩庫截至道光二十五年六月初七日止共實貯正雜等項銀一百二十三萬三千八百二十兩零錢五萬二千二百五十一千零道庫共實

貯銀九千六百四十五兩零按款盤驗逐一彈兌
數均相符並無虧挪情弊除於署藩司交代案內
出結具

題外合併附陳謹

奏

硃批戶部知道欽此

揀員請調大荔縣知縣摺子

奏爲揀員請調要缺知縣仰祈

聖鑒事竊照大荔縣知縣潘政舉經臣奏請升補鄜州

直隸州知州業蒙

諭旨允准所遺員缺係衝繁難兼三例應在外揀員調補且係同州府附郭首邑漢回雜處時有發審案件非精明幹練之員不足以資治理臣與藩臬兩司於通省知縣內逐加遴選非現居要缺卽人地

未宜實無合例堪調之員惟查有鳳翔縣知縣熊
兆麟年四十八歲江西舉人由國子監修理監志
全書告成議叙知縣選授浙江富陽縣知縣調補
秀水縣知縣丁艱服闋起復赴部投供經吏部揀
選奉

旨熊兆麟著發往陝西以知縣差遣委用欽此道光二
十三年七月到陝

題補今職二十五年正月到任該員年強才裕敏練

安詳以之調補大荔縣知縣實堪勝任其因公處
分例免核計惟歷俸未滿三年與例稍有未符據
署藩臬兩司援人地實在相需之例會詳請

奏前來合無仰懇

天恩俯念要缺需員准以熊兆麟調補大荔縣知縣洵
於地方有裨如蒙

俞允該員以知縣調補知縣銜缺相當毋庸送部引

見所遺鳳翔縣衝繁中缺陝省現有應補人員容俟另

行請補合併陳明所有揀員請補要缺知縣緣由
謹會同署陝甘督臣鄧廷楨合詞恭摺具

奏伏乞

皇上聖鑒訓示謹

奏 道光二十五年七月二十六日具

奏奉

硃批另有旨欽此內閣奉

上諭李星沅奏請揀員調補要缺知縣一摺著照所請

陝西大荔縣知縣員缺准其以熊兆麟調補該部知道欽此

審擬教匪摺子

奏爲審明習教匪徒邪言惑衆竝聽從傳布各犯分別定擬仰祈

聖鑒事竊照陝省訪獲青蓮教匪周位掄卽張利貞妄布邪言希圖惑衆歛錢暨鄧三謨蕭剛等聽從教首李一原來陝傳布煽誘一案業經臣將查辦情形兩次陳

奏在案茲據委員西安府知府李希曾督同咸甯長

安等縣審擬由署藩司劉源灝署臬司崇綸勘解
前來臣隨提犯親鞫緣周位掄卽張利貞同兄周
位猷卽固上一姪周榮正卽張清江籍隸湖南清
泉縣與四川人鄧三謨蕭剛卽蕭壩謝泳先康汰
生周導亨顧品良王尙儉苟喜雲谷善修宋會鄧
紅順蕭德尙趙玉清劉升均不認識道光十三年
九月周位掄在本省拜城步縣人呂文炳爲師演
習青蓮教坐功運氣念誦三皈五戒無上妙品等

經其教以達摩爲祖有衆生添恩證恩保恩引恩
頂航名次十九年周位掄欲出外收徒斂錢遂充
頂航自號摘光祖師至江西湖北及本省郴州清
泉湘潭等處先後收徒十人又在長沙地方收陝
西人蘇姓及伊姪周榮正爲徒均止坐功運氣竝
未念經得錢一二千文不等周位歆亦於二十二
年正月拜本省城步縣人楊作錦習教傳徒二名
嗣周位掄在各處古廟竝不識姓名人荒貨擔上

檢獲收買推背圖東明律風輪經託天神圖等書
於二十三年正月至湖北漢口起意假捏邪言希
圖另立教會惑眾傳徒多得錢文遂稱靜坐出神
忽見天有白光知人不久遭劫編成七十二種魔
道未來三灾八難名爲九蓮寶譜書寫散布又言
得有天書三卷註明伊係彌勒佛轉世將成大道
製造金冠雲履仙衣壽帶黃旗佛冠及畫蘭龍虎
字軸竝買鐵劍謂能鎮邪驅瘟與彭超凡陳汶海

相遇談道彼此兩不相下爭論而散嗣聞彭超凡等不許伊在漢口傳教慮其人衆加害卽改姓名爲張利貞赴各處躲避維時周位猷周榮正帶同學習生意之何春成於二十四年八月至漢中收買烟葉木耳周位掄適由樊城至彼此會遇同居告知前情囑其父子亦改姓名以防彼教加害周榮正遂改名張清江周位猷將周字拆開改名周上一擬各販貨南歸周位掄獨將所造邪言乘間

向人引誘收湖北人胡體乾爲徒備送功果錢二百四十千文此周位掄另起教會造言煽惑之原委也至鄧三謨蕭剛均在川省拜南部縣人李一原爲師念誦開示等經李一原素習青蓮教自號依微子與湖北陳汝海彭超凡等謀復邪教惑衆斂錢復與鄧三謨蕭剛商捏將有水火刀兵大劫人若出錢入教即可免災等語令蕭剛赴西安鄧三謨赴漢中分投布散李一原又畫符籙分給竝

酌予盤費攜帶普度條規此詩寶光寶籙金丹
訣俾各傳徒斂錢蕭剛隨收宋會爲徒鄧三謨因
苟喜雲谷善修會隨李一原習教亦卽相邀同行
於二十四年冬臘月先後分抵兩處各照李一原
所造妖言暗中傳播因人地生疎多不信從蕭剛
並未傳徒僅鄧三謨在漢中誘同鄉人趙玉清劉
升爲徒尙未念經各送錢數百文李一原又令謝
泳先帶同伊徒康汰生王尙儉周導亭顧品良送

信漢中知會鄧三謨如得有錢文卽寄各處度用
竝囑謝泳先至西安幫同蕭剛傳教謝泳先等僱
黃三蕭德尙鄧紅順挑負行李旋誘蕭德尙鄧紅
順拜從習教由漢中起身於二十五年正月到省
會遇蕭剛同住此又鄧三謨蕭剛等聽從李一原
捏造妖言分遣妄布之情由也嗣經西安漢中兩
府督同咸甯長安南鄭等縣同時訪聞會營查拏
竝將蕭剛素識勸令入教未允之陳信順朱振瀾

甘興悅三名一併獲案隨各起出經卷符籙口訣
道冠衣履等件分別稟報批飭解省併案委員督
同訊供由臣疊次具

奏分咨緝拏茲據審擬解勘親提研鞫各供前情不
諱臣查周位掄所藏冠履衣帶等件及畫蘭龍虎
字軸均不過尋常之物猶不足怪杏黃旗亦係紙
剪上書敕令萬雲龍五字惟經卷鈔本內如推背

圖東明律風輪經九蓮寶讚託天神圖無上妙品

等書非語涉悖逆卽事近妖邪又蕭剛鄧三謨謝
泳先等各經訣如普度條規二本內以雲城斗牛
宮爲開道根基及王法當權佛法未顯應宜檢密
暗釣賢良數語又乩詩內三豕遇龍八牛逢犬等
句殊涉狂謬均難保無另有邪術謀爲不軌重情
且李一原究奉何人爲教主其教原分十地尙有
九處均係何人認往該犯等所收徒衆究有若干
必須確切根追疊經反覆究詰據周位掄供稱委

欲另興教會傳徒斂錢是以假稱劫難危詞編寫
傳播推背圖東明律等書俱是舊時檢買卽所製
造各物亦係詐言降魔希圖煽惑竝無另有邪術
蓄謀不軌伊兄周位猷同姪周榮正與伊會遇擬
各販貨回南亦無商布邪言之事又據鄧三謨蕭
剛同供李一原商令伊等妄布邪言四出煽惑無
非爲廣傳徒衆多獲銀錢與周位掄等爭教角勝
起見委無謀爲不軌情事至李一原曾言奉湖北

朱普明爲教主伊等並未見過不知究係何人其餘九地何人認往伊等皆李一原由川分遣並未到過湖北實不能悉其詳普度規條及乩詩亦李一原散給如李一原果有別情現已身犯重罪尙復何所顧慮匿不供吐各等語復提各犯隔別熬審均無悖逆實跡訊之周位猷謝泳先等僉稱實止習教傳徒俱未隨同布散邪言周榮正宋會等僉稱各止拜師茹素竝未念經傳徒加以刑嚇矢

口不移案無遁飾查例載妄布邪言書寫張貼煽惑人心爲首者斬立決爲從者皆斬監候又一切左道異端煽惑人民爲從者改發回城給大小伯克及力能管束之回子爲奴各等語此案周位掄卽張利貞習教念經捏稱道號傳徒復敢收藏推背圖等項妖書起意另立教會混寫灾劫邪言傳布煽惑實屬不法應按律問擬周位掄卽張利貞除隱藏妖書輕罪不議外合依妄布邪言書寫張

貼煽惑人心爲首斬立決例擬斬立決鄧三謨蕭
剛卽蕭壩聽從李一原傳習青蓮教竝商同捏造
災難邪言分途煽誘俱應依妄布邪言書寫張貼
煽惑人心爲從斬候例擬斬監候周位猷卽固上
一謝泳先康汰生顧品良周導亨王尙儉苟喜雲
谷善修八犯拜師念經習教傳徒尙無布散邪言
情事均合依一切左道異端煽惑人民爲從改發
回城給大小伯克及力能管束之回子爲奴例改

發回城給大小伯克及力能管束之回子爲奴各
照例刺字周榮正卽張清江宋會蕭德尙鄧紅順
趙玉清劉升六犯被誘拜師習教尙未念經傳徒
均應於周位猷等遣罪上量減一等擬杖一百徒
三年事犯到官在道光二十五年五月二十四日
清刑

恩旨以前惟係習教匪犯定例遇

赦不赦應不准其援減分別遞籍定地充徒何春成

隨同周位猷學習生意黃三受僱謝泳先挑送行李均無習教情事陳信順朱振鳳甘興悅與蕭剛素識勸令入教未允惟與教匪往來亦屬不合應各照不應重律杖八十事犯到官在欽奉

恩旨以前所得杖罪應准援免何春成年未及歲並免收贖各遞籍管束失察各牌保等飭令查傳責懲周位掄所得胡體乾錢一百四十千文照追入官其餘斂錢並無確數免其著追經卷符籙衣劍等

件案結銷燬李一原等各犯均應由獲犯地方審辦逸犯胡體乾等通飭各屬實力查拏並分咨各省緝獲另結除全案供招咨部外理合恭摺具

奏伏乞

皇上聖鑒飭部核覆施行謹

奏
道光二十五年八月十六日具

奏奉

硃批刑部速議具奏欽此

李文恭公奏議

卷八

陝撫

二十

附奏請獎拏獲習教匪犯各員片子

再此案習教匪犯前據西安漢中兩屬稟報共訪
獲二十二名

臣卽飭提審辦奏奉

硃批查辦甚好嚴行根究毋致縱脫欽此現經督飭審
擬恭候

命下因查該犯等均係外來教匪甫至陝省卽經各縣
訪聞先後密速拏獲俾首夥不致漏網邪教不至
蔓延緝捕尙屬認真與失察本境習教傳徒及藏

匿日久始經獲案功過僅足相抵者自有區別當
整飭捕務之會地方官各知奮勉尤不忍沒其微
勞所有此次訪獲各犯之署咸甯縣事淮升鄆州
知州潘政舉長安縣知縣張籤南鄭縣知縣朱清
標可否仰懇

天恩敕部議叙以示鼓勵之處出自

鴻慈合併附陳伏乞

聖鑒訓示謹

奏 道光二十五年八月十六日附

奏奉

硃批另有旨欽此內閣奉

上諭李星沅奏請將訪獲習教匪犯之員鼓勵等語此次外來教匪甫至陝省卽經各該縣訪聞拏獲不致蔓延與本境匪犯日久獲案功過僅足相抵者不同所有訪獲各犯之署咸甯縣事准升鄜州知州潘政舉長安縣知縣張鑱南鄭縣知縣朱清標均著交部

從優議叙欽此

審擬謀故殺期親兄嫂二命人犯摺子

奏爲審明謀故殺期親兄嫂二命人犯按律定擬恭
摺奏祈

聖鑒事竊照署咸陽縣知縣凌樹棠具報民人解長青
砍傷胞兄解長春並嫂解邊氏均各身死一案當

經臣以情罪重大批司轉飭押帶犯證至省審辦
茲據委員西安府知府李希曾督同該署縣審擬

由署臬司崇綸勘解前來臣隨提犯親鞠緣解長

青籍隸咸陽縣弟兄四人已死解長春居長次解
長秋三卽該犯解長青四解凝凝子邊氏係解長
春之妻道光十五年正月解長春因家貧人衆逼
逐解長秋等各自出外乞食解長青遂赴口外傭
趁次年積得工銀二兩寄伊父解發武用度時解
發武已於先年十月病故解長春不以實告仍作
伊父口氣覆信並令陸續寄貲養贍解長青信實
隨時措寄銀三五兩不等二十四年冬間解長青

因父年老回籍省視二十五年正月抵家始知父
故解長秋外出無蹤解凝凝子經伊母舅收留傭
工一家星散原向抱怨解長春轉以父故殯葬致
欠外債將解長青餘銀十兩搜出竝所帶回馬二
匹賣錢花銷解長青無奈隱忍適鄰人劉全恒向
索解發武在日舊借典當衣服解長青無力認賠
投同總麻服叔解發瑞族鄰解世發與解長春計
較解長春嚷罵欲毆邊氏復幫同潑鬧解發瑞等

處令兩人隨後各半認還解長春從此嗔恨常向
解長青斥罵不許在家居住並囑邊氏弗與飯食
邊氏遂亦借事指罵三月間解長青因被兄嫂欺
壓難堪移居村外空廟擬於七月十七日仍赴口
外覓工十五日下午解長春聞知恐解長青走後
劉全恒向其全索衣價喚同往催解長青央緩劉
全恒不允爭吵解長春復在場嚷逼經解發瑞趨
勸始散解長青因被逼鬧憶及解長春先逐弟輩

乞食父死又不令伊奔喪假捏父書誑寄銀兩使
用今又奪伊餘銀馬匹不容在家食宿種種很毒
無情一時忿恨起意將其致死是夜三更時分攜
帶沿途防身腰刀前往喚開大門進院解長春查
問解長青拔刀連砍致傷解長春偏左偏右聲喊
倒地亂滾解長青又砍其左肩甲左肋右臂膊右
手腕左手臂並戳傷心坎肚腹刀尖帶傷胸膛邊
氏聞喊執持木楸趕出撲打解長青觸起邊氏素

行潑悍待伊刻薄起意一併殺害洩忿卽用腰刀
格落木楸左手揪住頭髮揸撲地上砍傷腦後相
連左耳根髮際項頸維時解長春之子解印娃驚
起瞥見跑出門外喊救解世發解發瑞俱各在院
乘涼聽聞趨至喝阻查看解長春邊氏均已因傷
殞命向解長青詢悉情由報縣驗訊通詳批飭解
省委員督同審擬由司勘轉親提研鞫據供前情
不諱反覆嚴詰委無起衅別故及同謀加功之人

供證確鑿案無遁飾查律載謀殺期親尊長已殺者凌遲處死等語此案解長青因伊兄解長春屢次欺壓心懷忿恨起意夤夜喚門進院用刀亂砍致死實屬跡顯著並挾伊嫂邊氏相待刻薄之嫌復臨時揪跌砍傷致斃死係夫妻二命應以一家論斷惟該犯謀殺期服胞兄罪至凌遲自應按服制從重問擬解長青除故殺兄妻同凡論罪止斬候不議外合依謀殺期親尊長已殺者凌遲處

死律凌遲處死仍照例梟示查明斷付財產劉全
恒聽從解長春逼索吵鬧致釀滅倫重案應照不
應重律杖八十著加枷號一箇月滿日折責發落
解發瑞解世發勸處解長青分認欠項係圖息事
起見應與力難勸阻之屍子解印娃均予免議解
長春侵奪解長青銀兩馬匹身死免追無干省釋
屍棺傷屬領埋兇器腰刀案結銷燬除全案供招
咨部外所有審明定擬緣由理合循例恭摺具

奏伏乞

皇上聖鑒敕部核覆施行謹

奏
道光二十五年八月十六日具

奏奉

硃批刑部速議具奏欽此

涼州副都統文祥呈請開缺摺子

奏爲據情代奏請

旨仰祈

聖鑒事竊臣於道光二十五年八月二十四日接准涼

州副都統文祥呈稱竊文祥由熱河駐防協領蒙

恩簡放涼州副都統本年五月內奏准

陛見七月二十五日交卸起程緣向在熱河圍場差次

染受潮濕得患腿疾自抵涼州以來間有舉發尙

不致誤職守茲因山路崎嶇秋風漸冷至平涼府
道上腿疾復發筋絡作痛沿途醫治總未見效頃
始力疾行抵西安步履維艱日甚一日動輒需人
扶掖精力頓減實難支持據醫家云氣血兩虛非
旦夕所能平復必須從容診治方可就痊惟有呈
請代

奏懇

恩准令開缺回旗調理一俟病體全愈卽當求

賞差使勉圖報效等情臣當卽札委署臬司崇綸前往該副都統寓所驗視旋據該署臬司驗看得該副都統步蹇力衰形神恍惚不能自繕奏摺是以特呈轉懇委係患病屬實出具竝無扶同印結竝取醫生甘結稟請覆核前來臣復親往看視該副都統病勢與署臬司崇綸所稟無異理合據情代奏可否准令該副都統開缺回旗調理之處恭候諭旨遵行所有據報患病委驗屬實緣由謹繕摺奏

聞伏乞

皇上聖鑒訓示謹

奏 道光二十五年八月二十五日具

奏奉

硃批另有旨欽此內閣奉

上諭據李星沅奏涼州副都統文祥具呈因腿疾請開缺轉奏一摺文祥因腿疾步履維艱照依所請准其開缺回旗調理所遺涼州副都統著興泰補授欽此

揀員對調知縣摺子

奏爲知縣人地未宜揀員對調仰祈

聖鑒事竊照州縣各缺例分繁簡卽同一簡缺而治理
難易今昔亦有不同臣督飭司道於通省州縣隨
時畱心察看務期人地相宜不敢稍涉遷就茲查
同州府屬之韓城縣本屬簡缺近來民生富庶訟
獄日滋其地瀕大河界連晉省時有交涉案件現
任知縣傅德謙直隸舉人捐納知縣分發陝西

題署今職道光二十二年十月到任試署期滿實授
該員樸實勤奮公事尙無貽誤惟於讞牘殷繁之
處辦理未能裕如應卽酌量更調查有府谷縣知
縣沈雲驤江蘇進士卽用知縣分發陝西補授今
職道光十八年四月到任該員年強才練明敏有
爲以之調補韓城縣知縣可期遇事整飭所遺府
谷縣知縣事簡民淳較爲易治卽以傅德謙對調
亦堪勝任據署藩臬兩司查明各該員均無降革

留任及展參處分會詳請

奏前來合無仰懇

天恩俯准將府谷縣知縣沈雲驤與韓城縣知縣傅德謙互相對調一轉移間人地各得其宜洵於公事有益如蒙

俞允該員等係以簡缺對調毋庸送部引

見合併陳明臣爲慎重地方起見謹會同陝甘督臣惠吉合詞恭摺具

李文恭公奏議

卷八

陝撫

三十一

奏伏乞

皇上聖鑒訓示謹

奏 道光二十五年八月二十五日具

奏奉

硃批另有旨欽此內閣奉

上諭李星沅奏知縣人地未宜揀員對調一摺著照所
請陝西韓城縣知縣准其以沈雲驤調補所遺府谷
縣知縣員缺卽以傅德謙對調該部知道欽此

附奏委署西安府知府片子

再西安府知府李希曾現據詳報患病懇請開缺
回旗調理經臣另疏具

題請

旨簡放所遺印務應先揀員接署查有漢中府知府徐
棟品端心細練達安詳堪以委令署理所遺漢中
府員缺查有乾州直隸州知州常瀚年壯才明辦
事勤慎堪以委署據署藩臬兩司會詳前來除批

飭遵照外合併陳明謹

奏

硃批覽欽此

奏報秋禾約收分數摺子

奏爲恭報陝省秋禾約收分數仰祈

聖鑒事竊照秋禾約收分數例應先行

奏報茲據西安延安鳳翔漢中榆林同州興安商州

邠州乾州鄜州綏德十二府州將所屬秋禾約收

分數開摺呈報由司具詳前來臣覆加查核統計

陝西各屬九十一廳州縣多寡牽算約計收成六

分有餘理合繕具清單恭呈

御覽伏乞

皇上聖鑒謹

奏
道光二十五年八月二十五日具

奏奉

硃批覽欽此

委護道篆並署府州縣各缺摺子

奏爲委員兼護道篆並署府州縣各缺緣由仰祈

聖鑒事竊據榆林府知府徐松稟報患病懇請開缺回籍調理容臣另行恭疏具

題請

旨簡放所遺兼護延榆綏道篆查有延安府知府色克通阿年力富强辦事勤慎甫准對調甘肅鎮西府知府交卸尙需時日堪以暫令兼護其榆林府印

務查有綏德直隸州知州江士松老成妥實熟悉
情形堪以委令署理又乾州直隸州知州常瀚委
署漢中府事所遺員缺查有醴泉縣知縣龔瑛年
壯才敏堪以委署又臨潼縣知縣劉建韶因卓異
赴部引

見所遺員缺查有朝邑縣知縣程義勲才具穩練堪以
接署據署藩臬兩司會詳前來除分別檄飭遵照
外理合循例具

奏伏乞

皇上聖鑒謹

奏 道光二十五年九月二十一日具

奏奉

硃批覽欽此

查報陝省三年以前民欠及借穀各數摺子

奏爲查明陝省二十年以前民欠正耗銀糧草束及
借易常社倉穀各數遵

旨開單具奏仰祈

聖鑒事竊臣准戶部咨道光二十五年八月初三日內
閣奉

上諭朕勤求民隱子惠元元自御極以來蠲賦緩征恩
膏疊沛所願人安樂利戶裕益藏俾閭閻日臻康阜

因念各省民欠錢糧自道光十五年降旨蠲免後計期已逾十稔本年恭逢

聖母皇太后七旬萬壽海寓乂安民物豐豫允宜推廣

慈恩覃敷闡澤用昭錫類之仁所有各省節年正耗民欠錢糧及因災緩徵帶徵銀穀並借給籽種口糧牛具及漕項蘆課學租雜稅等項著各該督撫將軍府尹等將道光二十年以前實欠在民者詳晰查明該省所屬某州某縣銀穀若干速行開單具奏候朕降旨

全行豁免並著先將此旨刊刻謄黃徧行曉諭務使
城市村鄉咸喻朝廷德意毋任官吏胥役等延擱侵
漁致滋弊竇期吾民休養生息孝弟力田比戶可封
催科不擾用副朕延

釐篤祐申錫無疆至意該部卽遵諭行欽此仰見

皇上錫福同仁

恩施格外跪讀之下曷勝欣幸遵卽刊刻謄黃飭發各
屬徧貼城鄉村鎮務俾小民一體咸知吏胥無從

影射竝行司轉移道府確查去後茲據各道府州將節年民欠未完緩徵起存正耗銀糧草束以及因灾借給本折籽種口糧竝借易常社倉穀各數查明申覆由署藩司劉源灝彙核具詳前來臣查陝西省道光二十年以前竝無民欠牛具學租雜稅等項銀兩惟地丁起存正耗銀糧草束有實在民欠緩徵起運銀一千一百七十八兩四錢一分八釐存留銀四千八百四十六兩七錢九分三釐

六毫耗羨銀九百三兩七錢八分本色糧二萬一
千四百三十三石一斗四合四勺草一萬四千五
百三十七束十一觔三兩八錢九分九釐羨餘米
三十六石起運本色糧一百九石四斗八升八合
七勺因灾出借籽種口糧常平倉本色京斗糧九
千五百三十六石四斗八升社倉京斗糧二萬四
千四百六十九石九斗五升三合三勺折色銀一
十五萬七千一百五兩三錢九分三釐又陝省常

社倉糧每遇青黃不接之時體察情形出陳易新以資接濟均各按年奏銷報部在案此項未完糧石計自道光十一年起至二十年底止實在民欠常平倉出易京斗糧六萬六千五十石七斗一升二合七勺社倉出借京斗糧三萬二千五百八十五石六斗二升二合八勺連年以來或因收成歉薄或因偶被偏災以致未能徵收積欠在民雖節經嚴飭地方官實力比催無如年分久遠小民貧

困艱於完納可否仰沐

皇仁渥霑

閭澤相應一併分晰開具清單恭呈

御覽除將該司齎到清冊送部外所有查明節年民欠

銀糧草束數目理合恭摺具

奏伏乞

皇上聖鑒謹

奏

審擬越獄脫逃絞犯摺子

奏爲拏獲越獄脫逃絞犯審明定擬具奏仰祈

聖鑒事竊照襄城縣賊犯黃汶章糾竊逾貫在獄脫逃一案前經臣將管獄等官恭摺參

奏奉

旨這所參疎防監犯脫逃之陝西襄城縣典史喬永安著革職拏問交該撫提同刑禁人等嚴訊確情按律定擬具奏襄城縣知縣侯國璋著卽勒令嚴緝俟限

滿能否弋獲竝公出有無案據著該撫查明分別辦理餘依議欽此當卽欽遵勒令嚴緝竝飭司委審去後適據該縣侯國璋稟報督飭典史喬永安會營帶同兵役於八月初三日躡至鳳縣北星地方協同該處兵役將黃汝章拏獲隨批飭解省歸案訊辦茲據委員署西安府知府徐棟審明定擬由署臬司崇綸解勘前來臣親提研訊緣黃汝章籍隸四川儀隴縣於道光二十五年二月初六日至襄

城縣覓工與素識在逃之張正洪劉老二鄧狗包
子李老么遇道貧難黃汶章起意糾竊卽於是夜
攜帶雲梯尖刀餘俱徒手偕抵馬獻圖客店挖洞
進內竊出過客張風王文輝衣包兩箇攜至僻處
查點共銀五封約重四百餘兩衣物布疋三十餘
件黃汶章分銀大小二十錠六件竝白布一疋衣
襪五件其餘銀物張正洪等俵分各散旋經事主
報縣會營協緝將黃汶章一犯盤獲連贓帶縣訊

詳收禁五月二十五日該縣侯國璋因另案奉調
赴府會審六月初三日傍晚典史喬永安進監收
封驗明鐐鑰鎖柵復諭禁卒傅成小心看守是夜
五更傅成同更夫李明等困倦睡熟黃汶章起意
乘間越獄脫逃卽扭斷鐐鑰柵鎖潛至西北牆角
脫去紅衣褲撥開水道磚塊爬出先藏城邊空地
黎明混出城門而逸及傅成醒覺喊同更夫查找
無踪稟經該典史申報該縣馳回勘訊詳緝經臣

參

奏行提刑禁飭委審辦八月初三日該犯逃至鳳縣
北星地方卽被該縣督飭典史帶同兵役同鳳縣
兵役獲解來省委員提同刑禁審擬由司勘解親
提研鞫據各供認前情不諱嚴究該犯此外再無
窩夥竊劫別案其在獄脫逃委係刑禁人等一時
疎於防範竝無鬆刑賄縱情弊逃後亦無行兇爲
匪及知情容留之人究詰不移案無遁飾查例載

犯罪囚禁在獄僅止一二人乘間穿穴踰牆脫逃
原犯斬絞監候應入緩決者大於秋審情實又監
犯越獄如獄卒果係依法看守一時疎忽偶致脫
逃竝無賄縱情弊者依律減囚罪二等人捕獲
不准免罪又律載獄卒不覺失囚減囚罪二等司
獄官典減獄卒罪三等又例載羈禁斬絞重犯越
獄脫逃將管獄官革職拏問四箇月限內拏獲卽
行革職免其拏問各等語此案黃汝章糾同在逃

之張正洪等行竊事主張風等銀物計贓均在一
百二十兩以上業據供明按律罪應絞候秋審入
緩乃該犯輒敢越獄脫逃實屬藐法應依例問擬
黃汶章合依犯罪囚禁在獄僅止一二人乘間穿
穴踰牆脫逃原犯絞監候應入緩決者入於秋審
情實例擬絞監候入於秋審情實仍盡竊盜本法
刺字禁卒傅成訊無賄縱情弊逃犯又於限內被
獲惟係他人捕得例不免罪傅成合依律於黃汶

章絞罪上減二等杖一百徒三年至配折責安置
刑書王西治應依律於傅成滿徒罪上減三等擬
杖七十徒一年半據供親老丁單俟確查取結另
行辦理更夫李明竝不小心防範應照不應重律
杖八十折責發落典史喬永安於四箇月限內帶
同兵役拏獲逃犯業經革職照例免其拏問褫城
縣知縣侯國璋先因奉調公出確有月日案據可
查又於限內獲犯失防職名例得免參逸賊張正

洪等飭緝務獲另結所有拏獲鄰境越獄絞犯應
議文武職名竝飭查明開報除供招咨部外理合
恭摺具

奏伏乞

皇上聖鑒敕部核覆施行謹

奏

奏報交卸署篆請

訓入京摺子

奏爲恭報

微臣

交卸署篆仍遵前

旨入京籲求

恩訓事

臣

於本年正月奉

命調補江蘇四月交卸入京行至山西靈石縣復奉暫

署陝撫之

諭遵卽折回受篆恭摺

李文恭公奏議

卷八

陝撫

陝撫

四十五

奏明在案茲陝西撫臣鄧廷楨於十月初六日由甘
旋任臣謹將關防文卷等件當卽委員齎交定於
卽日起程北上積

九陛就瞻之願逾切星馳念三吳負荷之難祇深水凜
惟望

宸輝而泥首欽承

慈誨以銘心依戀下忱無任欣抃所有微臣卸篆起程
緣由理合繕摺具

奏伏乞

皇上聖鑒謹

奏 道光二十五年十月初六日具

奏奉

硃批知道了欽此